



## С Л У Ж Б А новомученикам и споведникам Запорожского края.

### НА ВЕЛИЦЕЙ ВЕЧЕРНИ

**Блажен муж: 1-й антифон. На Господи, воззвах: стихиры на 8,  
глас 4.**

**Н**ыне Церковь Христова торжествует, / новым одеянием  
украшившись, / яко баняницею и виссом, кровьми новых  
мучеников, / ихже, яко жертву непорочну / и благоугодну  
Господеви приносящи, / со дерзновение к Нему взывает: /  
победителя показавый страстотерпцы Твоя, / увенчавый же тех  
и прославивый, / низпосли богатую милость / любовь совершающим  
чустную память их.

**Х**рам сый Божий красен и пречист, / светозарен и исполнен Духа  
Божественнаго, / явился еси святитею отче Сергие, / и судящим  
неправедно мужественне предстал еси, / обличая тех злочестие,  
пребогате, / и смертью своею Христово Божественное исповеда  
вочеловечение.

**К**ровными каплями / богоборчества огонь, священномучениче Матфее, погасив, / Христову Церковь напоил еси богато / и верных сердца уяснил еси, / благочестно почитающих твою священную память.

**Х**ристову домашнюю церковь ныне воспоим: / священномученика Михаила с супружницею Софиею. / Тии бо пламенем молитв своих / и добродетельным богокрасным житием / растопили еси безбожия лдяную твердыню, / и даже до смерти / в любви Господней и верности друг другу прибывше, / днесь в Божием Царстве молятся о нас.

### **Глас 8:**

**К**ротостию Христовою и молитвою / низложив врагов безбожная возношения, / яко воины Владычни, победнии венцы прияли есте, / Богомудрии отцы Александре, Викторе и Михаиле, / узы горькия и многотрудныя работы претерпевше, / отшли есте к блаженному покою, / идеже в некончаемой радости мблитесь о нас.

**Х**ристу Богу ныне дерзновенно предстоя, / страсотерпче отче Алексие, / и наслаждаяся ныне красоты Его нетленные, / не забуди сродного Отечества твоего, / но моли сохранитися нам от всякаго обстояния вражия / и, яко же ты, крепце утвердитися во благочестии / и спастися душам нашим.

**С**ветлый мученик славным страданием своим / Горния силы возвесели, / в день Воздвижения со крестом исповедническим / Небеса прошед, сонм мучеников радости исполни, / нам же на земли праздник воздвиже добропобеднаго своего преставления, / в немже подвиги его прославляюще, / яже за Христа даже до смерти претерпе, / сице к нему возопиим: / моли о нас, отче Димитрие, / получитьи нам райское вселение и велию милость.

**Е**гда ты рождшим Бог дарова, / страсотерпче Стефане славне, / тогда ты печатию любве Своя знамена / и тезоимением апостола и первомученика, / яко да, возрастом преспевая, / себе в вере Христовей крепце утверждаеши, / темже дерзнувше нечестивии / от Камня краеугольнаго тя отринути, / мученика славна ты соделаша.

### **Слава, глас тойже:**

**Л**ик новособранный, / вседоблее ополчение мучеников Господних / песньми восхвалим днесь, верных собрание, / с любовию к ним взывающе: / от всякия нас избавите беды и нужды, / всечестнии страдальцы / и молитесь о спасении душ наших.

**И ныне, Богородичен, глас тойже: Царь Небесный:**

## **Вход. Прокимен дне и чтения.**

### **Пророчества Исаиина чтение (глава 43):**

**Т**ако глаголет Господь: вси языцы собращася вкупе и соберутся князи от них. Кто возвестит сия в них или яже от начала, кто слышана сотворит вам? Да приведут свидетели своя и оправдятся, и да услышат, и да рекут истину; будите Ми свидетели, и Аз Свидетель, глаголет Господь Бог, и Отрок, Егоже избрах, да познаете и веруете Ми, и разумеете, яко Аз есмь: прежде Мене не бысть ин бог, и по Мне не будет. Аз есмь Бог, и несть разве Мене спасаяй. Аз возвестих и спасох, уничижих, и не бе в вас чуждий. Вы Мне свидетели, и Аз Господь Бог, и еще от начала Аз есмь: и несть от рук Моих избавляли; сотворю, и кто отвратит то? Сице глаголет Господь Бог, избавляяй вас Святыи Израилев.

### **Премудрости Соломони чтение (глава 3):**

**П**раведных души в руке Божией, и не прикоснется их мука; нещевани быша во очесех безумных умрети, и вменися озлобление исход их, и еже от нас шествие - сокрушение; они же суть в мире. Ибо пред лицом человеческим аще и муку примут, упование их безсмертия исполнено; и, в мале наказани бывше, великими благодетельствовани будут: яко Бог искуси я, и обрете их достойны Себе. Яко злато в горниле искуси их, и яко всеплодие жертвенное прият я. И во время посещения их возсияют, и яко искры по стеблию потекут. Судят языком и обладают людьми, и воцарится Господь в них во веки. Надеющиися Нань разумеют истину, и вернии в любви пребудут Ему; яко благодать и милость в преподобных Его, и посещение во избранных Его.

### **Премудрости Соломони чтение (главы 5 и 6):**

**П**раведницы во веки живут, о Господе мзда их, и попечение их у Вышняго: сего ради примут царствие благолепия и венец доброты от руки Господни, зане десницею покрывает я и мышцею защитит их. Приимет всеоружие - рвение Свое, и вооружит тварь в месть врагом. Облечется в броня правды и возложит шлем - суд нелицемерен. Приимет щит непобедимый - преподобие. Поострит же напрасный гнев во оружие; споборет же с Ним мир на безумныя. Пойдут праволучныя стрелы молниины, и, яко от благокругла лука облаков, на намерение полетят. И от каменометныя ярости исполнь падут грады; вознегодует на них вода

морская, реки же потопят я нагло. Сопротив станет им дух силы, и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите; навькните, судии концев земли. Внушите, держащие множества и гордящиеся от народов языков: яко дана от Господа держава вам, и сила от Вышняго.

### **На литии стихиры храма и святых, глас 2:**

**С**ошедшеся днесь, христоименитых собори, / с Горними  
Силами лик составим, / мучеников добропобедных радостно  
возвеличим, / подвигом исповеданий их просветившеся, /  
Триипостасному Божеству боголепно поклонимся, / Дивному и  
Славному во святых своих.

### **На стиховне стихиры, глас 2:**

**Подобен: ДOME Евфрафов:**

**Ц**еркве Божия украшение, / страстотерпцев Христовых славу, /  
мучеников Запорожския земли предивных, / любовь восхвалим,  
вернии, / почитающе добродетели и страдания их.

**Стих: М**ноги скорби праведным, / и от всех их избавит их Господь.

**М**ученицы добропобеднии, / молитвенницы о нас теплейшии, /  
услышите моления наша / и спасите град и люди / благочестно чтущих  
вас.

**Стих: В**оззваша праведнии, и Господь услыша их, / и от всех скорбей  
их избави их.

**Ж**илище Духа Святаго / явились есте, страстотерпцы, / добродетельным  
житием своим, / верою правою / и любовью Христовою.

### **Слава, глас тойже:**

**Т**роицы верных служителей, / Церкви светильников всесветлых, /  
мучеников Запорожских предивных / ныне, в память их сошедшеся, /  
воспоим любовь.

### **И ныне, глас и подобен тойже:**

**П**ресвятая Мати Божия, / с лики страстотерпцев / молися из Тебе  
Воплощенному, / Солнцу Правды, Господу, / спасти и просветити души  
наша.

**На благословении хлебов тропарь святых дважды и Богородице  
Дево: единожды.**

**Тропарь, глас 4:**

**Д**несь новоявленные звезды / на церковней показашеся тверди, / блистанием своим озаряючи малодущных сердца, / подвигом веры и страданиями за Христа красящесея, / добропобеднии мученицы и исповедницы, / словеса Спаса делом совершившии / и Божественныя Того страсти ясно в себе изобразившии, / ныне же молитесь прилежно / о иже любовьию вас почитающих, / спасти и просветити души наша.

**НА УТРЕНИ**

**На Бог Господь: тропарь святых дважды. Слава, И ныне, Богородичен.**

**По 1-м стихословии седален, глас 1:**

**Н**овое благославное воинство, / от многих мест же и градов богособранное, / мученицы вседоблии, законно пострадавшии и венчавшиися от Христа, / молитесь спастися душам нашим.

**Слава, и ныне, глас тойже:**

**Е**дина истинная христиан Покровительнице, / всяких лютых обстояний, / бед и скорбей нас избави / и молитвами Твоими спаси души наша.

**По 2-м стихословии седален, глас 2:**

**В** житии вашем, страстотерпцы Христови, / любовьию своею согревали есте всех / и молитвами своими покрывали есте / от различных зол и напастей, / темже и ныне не отрините нас от вашего заступления.

**Слава, и ныне, глас тойже:**

**У**стами и сердцем величаем Тя, / Матерь Божию: / Ты же, рождшая Бога, / не отрини нас от Твоего заступления.

**По полиелее седален, глас 4:**

**Д**несь пресветлое торжество / созывает верных собори, / и храмы Божии святии / оглашаются памятствованием дивных подвигов / и сладкозвучными именами / добропобедных новых страдальцев за Христа. / Темже и мы радостно воззовем: / предварите избавити нас от всяких бед, / сродницы наши добрии и приснии молитвенницы.

## **Слава, и ныне, Богородичен:**

Пророцы Тя предвозвестиша, / апостоли проповедаша, / мученицы прославиша, / святителие ублажиша, / темже и мы с ними Богородицу Тя исповедающе, / благочестно в песнях величаем.

**Таже степенна, 1-й антифон, глас 4. Прокимен, глас 4: Многи скорби праведным, / и от всех их избавит я Господь. Стих: Благословлю Господа на всякое время, / выну хвала Его во устех моих. Всякое дыхание: Евангелие от Луки, зачало 64.**

### **По 50-м псалме стихира самогласна, глас 6:**

Веселися, новомучеников множество, / православных удобрение, / новозакланнии агнцы, / веры поборницы и хранителие, / ходатаи о нас к Богу непостыднии, / в лета последняя, / страдании же подражатели первым мучеником явльшиися, / терпения столпи непоколебимии, / душам нашим испросите велию милость.

### **Канон Богородицы со ирмосом на 6 и святых канон на 8, глас 2.**

#### **Песнь 1**

**Ирмос:** *Грядите, людие, / поим песнь Христу Богу, / раздельшему море, / и наставльшему люди, яже изведе из работы египетския, / яко прославися.*

Песнь хвалебную, Богу содействующу, приносим вам, мученицы славнии: от избытка бо сердца глаголют уста и потщатся на славословие исправлений ваших.

Господа от юности вашае возлюбили есте, всечестнии, и ничтоже предпочли есте паче любве Его, и ныне сияете, яко звезды в чертозах Триипостаснаго Божества, мученицы всечуднии.

Струями кровей ваших, стардальцы, невидимыя враги потописте победительною десницею Христа, погрузившаго древнего мучителя в воде зельней.

С лики древних мучеников светом Трисолнечного Божества облистываемы, новомученицы славнии, предстательством вашим ниспосылайте просвещение поющим вас.

**Богородичен:** Неболезновавшая чревом, родшая Христа Господа, мольбами Твоими матерними исцели болезни душ и телес наших, да благодарно Сыну Твоему приносим победную

### **Песнь 3.**

**Ирмос:** *На камени мя веры утвердив, / расширил еси уста моя на враги моя. / Возвесели бо ся дух мой, вегда пети: / несть свят, якоже Бог наш, / и несть праведен паче Тебе, Господи.*

**Е**диному Богу возложивши души и помышления, тесный путь шествовали есте, тем получили есте Небеснаго Царствия наслаждение, идеже поете: несть праведен паче Тебе, Господи.

**Б**огосиянныя звезды, светом подвигов ваших и чудес сиянием верныя озаряете, священно восхваляющия вас и поющия: несть праведен паче Тебе, Господи.

**И**стине Евангельской с детства наученнии, животворныя заповеди Спасовы исполнили есте ревностно, страсотерпцы честнии, и явились есте проповедницы деятельнии пути спасительнаго.

**Т**роице Боже наш, молитвами новомучеников Твоих возвыси рог христиан православных и победы на враги даруй.

**Богородичен:** Ангелов удивление, человеков дерзновение, Богородице Чистая, Приснодево, моли Христа Бога, спасти непрестанно Тя блажащия.

### **Седален, глас 1:**

**У**годницы Христови, мученицы славнии, святителю Сергие, пастырие честнии и мирстии, молим вас, душ наших ныне уврачуйте неудобоисцельныя страсти, Человеколюбца и Волителя милости Христа умоляя.

### **Слава, и ныне, глас тойже:**

**У**пование христиан, Пресвятая Дево, Егоже родила еси Бога, паче ума же и слова, непрестанно моли с вышними Силами подати оставление грехов наших всех и исправление жития верою и любовию присно Тя славящим.

### **Песнь 4.**

**Ирмос:** *Пришел еси от Девы, / не ходатай, ни Ангел, / но Сам, Господи, воплощся, / и спасл еси всего мя человека. / Тем зову Ти: / слава силе Твоей, Господи.*

**Т**оки кровей ваших многобожия огонь погасиша, мученицы досточуднии, верным же роса явишася. Тем зовем Христу: слава силе Твоей, Господи.

**О**чистив первее от страстных молвы души ваша, прияли есте, честнии, помазание Божественно свято и при кончине страдальческими украсилися есте венцы.

**У**пасл первее люди благодатию, отче наш Сергие, безкровными жертвами, яко святитель, священно освящ и, яко агнец, заклан быв, Господеви приведеся.

**В**од духовных исполнишеся, мученицы славнии, реки явистеся воды живы мановением Живоначальных Троицы, от Неяже ниспосылайте певцем вашим мир, здравие же и спасение.

**Богородичен:** Нас, вопиющих к Тебе, Дево, от страстей свободы и Владыце, Сыну Твоему, яко церковь освященну, принеси.

### **Песнь 5.**

**Ирмос:** *Света подателю и веков Творче, Господи, / во свете Твоих повелений настави нас; / разве бо Тебе иного бога не знаем.*

**Д**ушу свою скорбию крепкою за люди твоя раздирая, ходатай явился еси за паству пред владыки земными и богоборцами нечестивыми, святителю отче Сергие, но паче же молитвенник всеизрядный ко Пресвятей Троице.

**О**браз были есте верным: словом, житием, любовью, отцы богоблаженнии, сего ради вселися в вас Дух Святой, и нам, помолитесь, стяжати Того благодать.

**В**олны мучения, воспняемая яростию богоборцев, не возмогоша потопити корабля душ ваших, благославнии, управляемаго Духом, дондеже внидосте в пристанище Царствия Небеснаго.

**Т**риипостасное Богоначалие воспоем, даровавшее молитвенники к Нему о нас святых новомученики, иже умилоствяют Тое о чтущих память их.

**Богородичен:** Лщением човекоубийцы древняго праотцы наша от Присносущных Жизни отпадоша: Рождеством Твоим, Чистая, земнороднии вси паки в рай восхищенни быхом.



## Песнь 6.

**Ирмос:** *В бездне греховней валяясь, / неизследную милосердия Твоего / призываю бездну: / от тли, Боже, мя возведи.*

**Разжени** Божественными угльми Святаго Духа, страстотерпцы, доблественным страданием просияете, святии, и стрелы сокрушите древняго змия, лъстиваго борца.

**Яко** кедры несокрушимыя муками, умножи вас Христос в Церкви Своей, исповедницы чуднии, и благодатию Своею убели души ваша паче всякия белизны земныя.

**Житие** ваше Божественно, жизнь боголепна и славна смерть, мученическими сияя добротами и чудес светлостьми озаряя сердца поющих вас.

**Призри** на моление недостойных раб Твоих, Отче, Сыне и Душе, и не лиши нас всесильнаго заступления Твоего, чтущих новыя мученики Твоя, страстей и искушений изъимая нас.

**Богородичен:** Архангельский глас вопием Ти: Радуйся, Благодатная, Господь с Тобою; радуйся, Благословенная, Заступница наша и скорая в бедах Помощница.

### Кондак, глас 2:

**В**о времена лютая ведоми бысте связаны от богоборцев / и в темницы затворени, / верою соблюдаеми, непобедими пребысте / и, отрешившеся телес, святии, Божественным желанием яве облекостеся. / Темже, яко светила, просияете в мире, / верныя просвещающе Духа благодатию. / Страстотерпцы мученицы, / молитв Христа Бога / согрешений прощение даровати / чтущим любовию святую память вашу.

### Икос:

**Несытною** ко Господу любовию дышуще, веры правыя не отвергостеся, и различныя обиды и поношения претерпесте, о Христе укрепляими, и мучителей дерзость низложисте, святии, и, непреклонно веру Христову сохраняюще, на Небеса преставистеся ко всех Творцу, за Негоже и пострадасте. Темже, дерзновение имуще, страстотерпцы мученицы, молитв Христа Бога согрешений прощение даровати чтущим любовию святую память вашу.

## **Песнь 7.**

**Ирмос:** *Телу златому премудрыя дети не послужиша, / и в пламень сами поидоша, / и боги их обругаша, / среди пламене возопиша, и ороси я Ангел: / услышася уже уст ваших молитва.*

**Во** огни мук, страсотерпцы, яко злато, искуси вас Господь, и, яко всесожжение тучно, прият, общники страстей Своих явив вас, всеблаженнии.

**Совершился** еси Духом помазания, священнотаиниче Сергие, и, совершив священники и народ, яко пастырь, совершил еси течение доброе, заклан быв за Христа, преподобне.

**Вод** духовных исполнишася, в воду ввержени бывше, страсотерпче отче Михаиле с супружницею твоею Софиєю, за Жизнь всех – Христа Царя, и Божественным мановением изнесена быша честная телеса ваша на сушу, и прелести изсушиша мутныя потоки силою Божиею, и верных сердца напоиша.

**Чашу** наливя всекрасно исповедания воистину, крепким твоим страданием всех напояеши, отче Матфее, с высоким проповеданием призывая.

**Хвалу** Единосущней Троице приносяще, не престайте, мученицы, просити нам сердце чисто и дух прав, да чисте поем: отцев Боже, благословен еси.

**Богородичен:** Владычице Милостивая, не возгнушайся язвами нашими греховными, Врача рождающая душ и телес наших, утоли болезни и исцели неможения, и спаси души наша.

## **Песнь 8.**

**Ирмос:** *В пещь огненную ко отроком еврейским снизшедшаго, / и пламень в росу преложшаго Бога, / пойте дела яко Господа, / и превозносите во вся веки.*

**Крест** Христов на рамена своя взем, рекл еси всеблаженне отче Димитрие: не ужасаюся всякаго болезней веления пребываема, ни мук страшящих мя, единого токмо чту Иисуса Господа, при понтийстем Пилате распеншагося.

**Я**ко красны ноги твоя, священнострадальче Алексие, стезю ходившия свидений Божественных, и в сих добре ступавшия, и к широте велицей Небеснаго Царства достигшия, мучениче славне.

**А**спидския злобы и коварства безбожнаго посрамители явились есте, иереи всеславнии Александре, Викторе и Михаиле, скорби за Христа яко награду приемлюще и среди мрака темничнаго благодарение Господу возсылающе, сим обличили есте безумие нечестивых.

**С** молитвою, бывшей во устех твоих, страдальче Стефане, предал еси душу твою в руце Живаго Бога и победоносно со славою возшел еси в чертог Его Небесный.

**П**рославим Троицу Нераздельную, воспоем Едино Божество, со Отцем Слово и Духа Всесвятаго.

**Богородичен:** Слово Отчее Единосущное, Адамово избавление от кровей Твоих девственных воплотися, Един, яко весть, Всепетая, спасая нас Своею благостию.

### **Песнь 9.**

**Ирмос:** *Безначальна Родителя Сын, Бог и Господь, / воплощься от Девы нам явися, / омраченная просветити, / собрати расточенная: / тем всепетую Богородицу величаем.*

**Б**езплотнии лица Ангелов возвеселишася в мученичестей за Христа кончине вашей, страстотерпцы достославнии, и священный чин мучеников радостно среташе вас в Вышних селениях.

**В**ладыка всех, Небесным вратом, отверстым вам, в обителех Отца Своего всели вас, доблемудрии, с первыми страстотерпцы Своими и славы их подобники сотвори, идеже поминайте поминающих вас.

**Н**евечерняго Света – Христа – звезды на земли со пресветлым Сергием священным явистесь, блаженнии, и всем человеков озаряете души, призывающим вас с верою и почитающим святую память вашу.

**П**амять вашу честную и светозарную почитающе и радующесь духом, молимся: блаженный Сергие, добрый святителю, с пострадавшими с тобою мученики, вся православныя люди сохраняй невредимы.

**Т**риипостасный Боже наш, новых мучеников Твоих приемый подвиги и преславно увенчавый их, тех предстательством спаси рабы Твоя и сподоби нас вечно славити Державу Твою.

**Богородичен:** Юже воспевают Силы Небесныя, Владычицу Деву, Церкви красоту, верных державу и похвалу, благодарно величаю и пение скончаваю.

**Светилен:**

Светом сияния Воскресшего Христа Жизнодавца озарившеся, страстотерпцы святии, за Ним последовали есте даже до смерти, и Того благодатию просветившеся, источники чудес и милостей явились есте, сего ради молим вас: спасите души наша.

**Слава, и ныне, Богородичен:**

Зарю пресветлую, являющую нам Солнце незаходимое, вемы, Тя, Пресвятая Дево Богородице. Сего ради молим Тя: яко Мати Света сущи, просвети нас светом Сына Твоего, Христа Бога нашего.

**На хвалитех стихиры святого, глас 1:**

Мученицы Христови прехвальнии, / гонителей стремления и нуждную смерть / ни во что же вменисте, / и, благодерзностно ополчившеся, / мужемудренно к борением победоносною славою одеясте, / и причтостесь всем праведным, / с нимиже вас, всегда хваляще, ублажаем.

Приидите, Безплотных лица, / во плоти сущим спразднуйте нам / в честней памяти страстотерпцев: / сии бо тело немощное носяще, / яко безплотнии, Христа ради подвизашася, / о лютых муках нерадивше, / с нимиже молитесь, / о еже стасться нам.

Приидите, мучениколюбцы, / насладимся мысленно духовныя днесь трапезы, / юже нам приложиша новомученицы земли нашея; / вы же, страстотерпцы неодоленнии, / со Ангелы духов водворяющеся, / просите Христа Спаса даровати грехов оставление нам, / вашу честную память совершающим верно.

Приидите, мучеников множества, / приветствуйте ныне друг друга: / древнии – новых, / соименнии – соименных, / подобнии – подобных, / срадующеся вкупе вси / в неизреченней славе Небесней / и молящеся, о еже спастися нам.

**Слава, глас 8:**

О новособранный личе! / Кто страстотерпческия подвиги ваша по достоянию восхвалит? / Вы бо, в различная лета / от различных мест сущии, / вси противу единого богоборческаго злочестия вооружишася, /

и за едино Богочестие многовидныя претерпесте муки. / И ныне на Небесех вкупе ликующе, / молитесь, о еже спастися нам.

### **И ныне, глас тойже:**

**Владычице**, прими молитвы раб Твоих / и избави нас от всякия нужды и печали, / Ты еси, Богородице, оружие наше и стена, / Ты еси Заступница, и к Тебе прибегаем, / Тя и ныне на молитву призываем, / да избавиши нас от врагов наших. / Возвеличим Тя вси, / Всенепорочную Матерь Христа Бога, / Юже осени Дух Пресвятой.

### **Славословие великое и отпуст.**

#### **НА ЛИТУРГИИ**

#### **Блаженны от канона святых песнь 3-я и 6-я. Прокимен, глас 4:**


**Святым**, иже суть на земли Его, / удиви Господь вся хотения Своя в них.

**Стих:** Предзрех Господа предо мною выну, / яко одесную мене есть, да не подвижуся. **Апостол к Римляном, зачало 99. Аллилуия, глас 4:**

**Возваша праведнии**, и Господь услыша их, / и от всех скорбей их избави их. **Стих:** Многи скорби праведным, / и от всех их избавит их Господь.

**Евангелие от Луки, зачало 105–106. Конец:** В терпении вашем стяжите души ваша. **Причастен:** Радуйтесь, праведнии, о Господе, / правым подобает похвала.

#### **МОЛИТВА**



, святии Новомученицы и Исповедницы земли нашея, верность Христу Богу даже до смерти свидетельствовавшии и венец жизни от Него приявшии! Вы во дни гонения лютаго, землю нашу от безбожных постигшаго, на судищах, в заточениях и пропастьх земных, в горьких работах и всяких скорбных обстояниях образ терпения и непостыднаго упования мужественно явили есте. Ныне же, в раи сладости наслаждающесе, пред Престолом Божиим во славе предстоите и присно хвалу и ходатайство со Ангелы и всеми святыми Триединому Богу возносите. Сего ради мы, недостойнии, молим вас, святии сродницы наши: не забудьте земнаго Отечества вашего, умолите Господа Сил, да утвердит Церковь Свою непоколебиму в мире сем многоятежнем и лукавом; да возродит в земли нашей дух братолюбия и мира; да паки будем мы царское священство, род Божий, избранный и святой, присно с вами славящий Отца и Сына и Святаго Духа во веки веков. **Аминь.**